

四庫全書

經部

欽定四庫全書

經部
古微書卷

三十三
三十三

詳校官監察御史臣施朝幹

刑部郎中臣許兆椿覆勘

總校官編修臣王燕緒

校對官中書臣田尹衡

謄錄監生臣金拱間

欽定四庫全書

古微書卷三十

明 孫穀 編

孝經鈎命訣

緯書以命言者莫如元包以鈎言者莫如春秋之
文耀鈎河圖之稽耀鈎茲撰孝經緯則直言訣矣
殆卽元命鈎耀之命而參其與以示人也故以訣
名

天子爵稱也三皇步五帝趨三王馳五霸驚又三皇步
五帝驟三皇馳五伯蹶七雄僵

按本注道隆德用日月為之步時事彌順日月為之
驟勤思不已日月乃馳

或稱帝王接上稱天子明以爵事天接下稱帝王明以
號令臣下

道機命者稱皇又帝受命握符出

說皆見前

孔子曰三皇設言民不違五帝畫象世順機三王肉刑

揆漸加應世黠巧偽奸多

多音絞
加音姬

三皇無文五帝畫象三王肉刑

注曰畫象者上罪墨象
赭衣雜役中罪赭衣縲

下罪雜
縲而已

按大戴盛德篇凡人民疾六畜疫五穀災者生於天
天道不順生於明堂不飾故有天災則飾明堂也凡
民之為奸邪竊盜厯法妄行者生於不足不足生於
無度量也故有奸邪竊盜厯法妄行之獄則飾度量

也凡不孝生於不仁愛也不仁愛生於喪祭之禮不
明故有不孝之獄則飾喪祭之禮凡弑上生於義不
明故有弑獄則飾朝聘之禮也凡鬪辨生於相侵陵
也相侵陵生於長幼無序而教以敬讓也故有鬪辨
之獄則飾鄉飲酒之禮也凡媼亂生於男女無別夫
婦無義故有媼亂之獄則飾昏禮享聘也故曰刑罰
之所從生有源不務塞其源而務刑殺之是為民設
陷以賊之也

又按尚書大傳曰決闕梁踰城郭而略盜者其刑臠
男女不以義交者其刑宮觸易君命革輿服制度奸
宄盜攘傷人者其刑劓非事而事之出入不以道義
而誦不詳之辭者其刑墨降畔寇賊劫略奪攘矯虔
者其刑死 此五刑之始也

唐堯五廟親廟四與始祖五禹四廟至子孫五殷五廟
至子孫六周六至子孫七

說已見前

刑罰藏頌聲作鳳凰至麒麟應封泰山禪梁甫

說已見前

華胥履跡怪生皇犧

跡靈威仰之跡也履跡而生以爲奇怪也

任已感龍生

帝嵬魁

任已帝魁之母也嵬神農名已或作似也

附寶出降大靈生帝軒

注軒黃帝名電黃精軒轅氣也

命星貫鼎修紀夢接生禹

注命使之星

說已見前

舜即位巡省中河錄圖受文地在洛水傍方堯禪舜沉
書日稷而赤光起舜禪禹沈璧堯禪赤光又起及湯觀

洛沈壁三投光不起矣

秘讀
如側

禹時五星累累若貫珠炳炳若連璧

堯夢乘青龍上泰山舜夢擊鼓桀夢黑風破其宮紂夢
大雷擊其首

按東漢周宣夢書曰昔聖帝明王之時神氣炤然先
見故堯夢乘龍上泰山舜夢擊天鼓禹夢其手長湯
夢布令天下後皆有天下桀夢疾風壞其宮紂夢大
雷擊其首齊桓夢為大禽所中秦二世夢虎齧其馬

王者夢之皆失天下

周禮太卜掌三夢之法一曰致夢二曰觶夢三曰咸
陟其經運十其別九十占夢掌以歲時占六夢之吉
凶一曰正夢二曰噩夢三曰思夢四曰寤夢五曰喜
夢六曰懼夢

又靈樞經陰氣盛則夢涉大水而恐懼陽氣盛則夢
大火而燔炳陰陽俱盛則夢相殺上盛則夢飛下盛
則夢墮甚饑則夢取甚飽則夢與肝氣盛則夢怒肺

氣盛則夢恐懼哭泣飛揚心氣盛則夢善笑恐畏脾
氣盛則夢歌樂身體重不舉腎氣盛則夢腰脊兩解
不屬凡此十二盛者至而寫之立已厥氣客于心則
夢見丘山烟火客于肺則夢飛揚見金鐵之奇物客
于肝則夢山林樹木客于脾則夢丘陵大澤坵屋風
雨客于腎則夢臨淵沒居水中客于膀胱則夢游行
客于胃則夢飲食客于大腸則夢田野客于小腸則
夢聚邑衝衢客于膽則夢鬪訟自刳客于陰器則夢

接內容于項則夢斬首客于脛則夢行走而不能前
及居深地窳范中客于股肱則夢禮節拜起客于胞
臚則夢溺凡此十五不足者至而補之立已也及讀
列子又有云凡以浮虛為疾者則夢揚以沉實為疾
者則夢溺籍帶而寢則夢蛇飛鳥啣髮則夢飛將陰
夢火將疾夢食飲酒者憂歌舞者哭與此稍別

性者生之質也若木性則仁金性則義火性則禮水性
則信土性則智也

情生於陰欲以時念也性生于陽以就理也陽氣者仁陰氣者貪故情有利欲性有仁也

東夷之樂曰昧南夷之樂曰任西夷之樂曰侏離北夷之樂曰禁

按禮記疏東方謂之夷者風俗通云東方人好生萬物觝觸地而出夷者觝也其類有九一曰玄菟二曰樂浪三曰高驪四曰蒲飾五曰鳧夷六曰索家七曰東室八曰倭人九曰天鄙南方曰蠻者風俗通云君

臣同川而浴極為簡慢蠻者慢也其類有八一曰天竺二曰咳首三曰焦僥四曰跂踵五曰穿胸六曰儋耳七曰狗軼八曰旁春西方曰戎者風俗通云斬伐殺生不得其中戎者兇也其類有六一曰僥夷二曰戎夷三曰老白四曰耆羗五曰鼻息六曰天剛北方曰狄者風俗通云父子叔嫂同穴無別狄者辟也其行邪辟其類有五一日月支二曰穢貊三曰匈奴四曰單于五曰白屋

賁居子曰凡夷狄而世雄長者類皆繫於神明之祚如槃弧之為黃帝女也鬼方之為陸終娶也勾吳祖周於越祖夏僊鬻亦祖夏禹而後世匈奴劉姓者皆祖漢室李姓者皆祖李陵夫皆有其自焉五季以下公主降夷夷女適中國變夷而雜夏者殆益不可問矣崔盧李鄭乎劉李張王乎此古人致謹于男女之防云其樂則難以悉考

天子臨辟雍親袒而割牲尊三老之象也竭志奉祝安

車象輪供執綏役

按禮記疏人君養老有四種一是養三老五更二是子孫為國難而死王養死者父祖三是養致仕之老四是引戶校年養庶人之老有虞氏以燕禮者崔氏云燕者殺烝於俎行一獻之禮坐而飲酒以至於醉夏后氏以饗禮者崔氏云饗則體薦而不食爵盃而不飲依尊卑而為獻取數畢而已殷人以食禮者崔氏云不飲酒饗大牢以禮食之殷人質素威儀簡少

故養老以食禮周人修而兼用之者備陰陽也凡飲
養陽氣凡食養陰氣陽用春夏陰用秋冬又云三老
以象三光五更以象五辰熊氏云天子視學之年養
老一歲有七謂四時皆養也

仲尼牛脣舌理七重吐教陳機受度又仲尼虎掌是謂

威射胸應矩是謂儀古又仲尼龜脊又孔子海口言若

含澤又夫子輔喉又夫子駢齒象鉤星也

按伏無忌古今注云孔子生之夜有二蒼龍自天而

下有二神女擎香霧於空中以沐徵在先是有五老
列於庭前則五星之精有麟吐玉書於闕里人家云
水精之子繼商周而素王出故蒼龍繞室五星降庭
徵在知其為異乃以繡紱繫麟角而去至敬王未魯
哀公一十四年魯人鉏商田于大澤得麟以示夫子
夫子知命之終乃抱麟解紱而涕泗焉

孫氏日杪曰相之不可憑也南史庾革傳革孫賈家
富于財食必列鼎又狀貌豐美頤頰開張人皆謂賈

必為方伯及魏克江陵夏以饑死時又有水軍都督
褚蘿面甚尖危從理入口竟保衣食而終唐柳渾十
餘歲有巫告曰兒相天且賤出家可免死渾不從仕
至宰相魏朱建平善相鍾繇以為唐舉許負何以復
加然相王肅年踰七十位至三公肅六十二終於中
領軍南史徐陵八歲屬文十三通莊老光宅寺慧雲
法師每嗟陵早死陵仕至太子少傅年七十七唐孔
若思傳孔季詡擢制科授校書郎陳子昂嘗稱其神

清韻遠可比衛玠而李調終左補闕世之以骨相繩人亦何惑哉

孔子在庶德無所施功無所就志在春秋行在孝經又曰丘以匹夫徒步以制正法以春秋屬商以孝經屬參

孝經者篇題就號也所以表指括意序中書名出義見

道曰著

就成也孝為一篇之目十八章成就號序中心之事使孝義見於外

一字包十八

章為天地喉襟道要德本故擬以題符

撰異

篇冠就曾子

撰斯問曰孝文乎駁不同何

與經同也

子曰吾作孝經以素

王無爵之賞斧鉞之誅故稱明王之道曾子避席復坐

子曰居吾語汝順孫以避災禍與先王以託權

託先王以為已

權勢

目至德要道以題行

題行題天子德行致羣瑞已行所及也

首仲尼

以立情性

情性猶天地已不正為天地子故行冠子以立之也

言子曰以開號

若夫

子所以自開於受命也

列曾子示撰輔

使君得祿圖之故行冠子以立之也佐與共治天下

也書詩以合謀

二人同心其利斷金同心臭如蘭也

按隋書孔子既叙六經題目不同指意差別恐斯道

離散故作孝經以總會之明其枝流雖分本萌於孝

者也遭秦焚書為河間人顏芝所藏漢初芝子貞出之凡十八章而長孫氏博士江翁少府后蒼諫議大夫翼奉安昌侯張禹皆名其學又說文序建光元年許冲上父慎說文曰古文孝經孝昭帝時魯國三老所獻建武時議郎衛宏所校皆口傳官無其說臣父學孔氏古文撰具一篇并上

孝經中契

孔丘見孝經文成而天道立乃齋以白之天玄雲涌北

極紫宮開北門召亢星北落司命天使書題號云孝經
篇目玄神辰裔孔丘知元命使陽衡乘紫麟下告地主
要道之君後年麟至口吐圖文北落郎服書魯端門隱
形不見子夏往觀寫之得十七字餘文二十消滅飛為
赤烏翔摩青雲

孝經右契

孔子夜夢豐沛之邦有赤烟起顏回子夏觀之驅車到
楚西北范氏之廟芻兒捶麟復其前折左足取薪覆之

子曰汝為誰曰吾姓赤松字喬特名受紀子曰有見乎
曰見一禽如鴈者羊頭上角其末有肉方以是西走子
發薪麟視子子趨而往麟蒙其耳吐書三卷子精讀之

孝經左契

將軍頤虎啣珠大夫正海出魚

又曰

封於泰山考績燔

燎禪於梁父刻石紀號垂度示典功平教教

孝經威嬉拒

欲去惡鬼須具五刑令五人皆持大斧著缺兜鍪駑之

常使去四千步不可令近人也

按風俗通引黃帝書上古之時有荼與鬱壘昆弟二人性能執鬼度朔山上章桃樹下簡閱百鬼無道理妄為人禍害荼與鬱壘縛以葦索執以食虎於是縣官常以臘除夕飾桃人垂葦艾畫虎於門皆追放於前事異以衛凶也桃梗梗者更也歲終更始受介祉也

古微書卷三十

欽定四庫全書

古微書卷三十一

明 孫穀 編

孝經內事圖

賈居子曰古人之學圖居左書居右圖植物也書
動物也書為經而圖為緯也互相質也緯書之有
圖惟易次則春秋蓋皆有儀物可記列耳孝經無
儀物安得有圖蓋天象玄隱非圖莫著而終以其

言隱也名之內事云

天子行孝德則景星見

按宋書符書志黃帝時有景雲之瑞有赤方氣與青方氣相連赤方中有兩星青方中有一星凡三星皆黃色以天清明時見於攝提名曰景星

王者動得天度止得地意從容中道陰陽合度則太微五帝座星明以光也

按晉志太微天子庭也黃帝坐在太微中黃帝座不

明人主求賢士以輔法不然則奪勢

王者得禮之制不傷財不害民君臣和草木昆蟲谷象

正性則三台為齊明不闕不狹如其度

宋筠曰君臣制度宮室車旗多

少各有科名則應也

按天官書魁下六星兩兩相比者名曰三能三能色

齊君臣和不齊為乖戾晉志云起文昌列抵太微西

近文昌二星曰上台為司命主壽次二星曰中台為

司中主宗室東二星曰下台為司祿主兵又泰階六

符經曰泰階者天子之三階上階上星為男主下星為女主中階上星為諸侯三公下星為卿大夫下階上星為士下星為庶人三階平則陰陽和風雨時不平則稼穡不成冬雷夏霜

王者遠嫌別微殊貴賤抑驕臣息亂子則屏星為之明以潤帝座章而光

宋鈞曰屏星五帝座明以潤章大也

按晉志屏四星在端門之內近右執法屏所以壅蔽帝庭也執法主刺舉臣尊敬君上則星光明潤澤

天子得靈臺之禮則五車均明河行不離其常

天子考察天氣

若梓慎見星之侵者也所以獲福禳災五車主五穀民禳災得福歲無饑寒之困五穀星之明以應之河若離常則有決溢之憂則九穀失所植矣

按晉志五車者五帝車舍也五帝坐也主天子五兵

一曰主五穀豐耗西北大星曰天庫主太白主秦次

東北星曰獄主辰星主燕趙次東星曰天倉主歲星

主魯衛次東南星曰司空主填星主楚次西南星曰

卿星主熒惑主魏又史記正義曰占五車三柱有變

各以其國占之三柱入出一月米貴三倍期二年出
三月貴十倍一季柱出不與天倉相近軍出米貴轉

粟千里

王者敬諸父有差則大角光明以揚

諸父伯仲叔季也
斗為帝車所乘也

角堅剛而居帝前帝
敬諸父感天應之也

按天官書大角者天王帝廷正義曰大角一星在兩
肩提間人君之象也占其明盛黃潤則天下大同也

大角為坐候

宋筠曰坐
帝坐也

昆弟有親親之恩則鈎鈴不離房

一作入房鈎鈴遠房則疏闊今昆弟相親

故天相近
明其友也

按晉志亢東咸西咸各四星在房星北房之戶所以
防佚淫也鍵閉一星在房東北鈎鈴主關鑰史記正
義曰鈎鈴兩星以閑防神府占明而近房天下同心
鈎鈴房星之間有客星出及疎折者皆地動之祥也
亦曰地動河清

斗曲杓橈象成車房為龍馬華蓋覆鈎天罡八魁神不

獨居故驂駕陪乘以道踟躕

宋注曰房星既體蒼龍人象駕馬故兼言之也覆

鈎既覆且鈎曲似蓋也天罡八魁又似御陪乘

按天官書斗為帝車運於中央臨制四鄉分陰陽建

四時均五行移節度定諸紀皆繫於斗

宋筠云是大帝乘車巡狩

故無所不紀也

晉志云房為四表亦曰天駟為天馬主車駕

南星曰左驂次左服次右服次右驂亦曰天廐又主

開閉為畜藏之所由也 大帝上九星曰華蓋所以

覆蔽大帝之坐也傳舍九星在華蓋上傳舍南河中

五星曰造父其西河中九星如鉤狀曰鉤星直則地動北落西南一星曰天綱主武帳北落東南九星曰八魁主張禽獸王良五星在奎北居河中其四星曰天駟旁一星曰王良亦曰梁為天橋主禦風雨水道道前一星曰策星若移在王良前居馬後是謂策馬則車騎滿野閣道六星在王良前飛道也從紫宮至河神所乘也

歲星守心則年穀豐鎮星合房符明道興太白合表四

夷從服之象黃氣抱日輔臣納忠

按容齋隨筆曰世之伎術以五星論命者大率以火土為惡故有晝忌火星夜忌土之語土鎮星也行遲每至一宮則二歲四月乃去以故為災最久然以國家論之則不然符堅欲南伐歲鎮守斗識者以為不利史記天官書云五潢五帝車舍火入旱金兵水水宋均曰不言水土者德星不為害也又云五星犯北落軍起火金水尤甚水土軍吉又云鎮星所居國吉

未當居而居已去而復還居之其國得土若當居而不居既已居之又西東去其國失其土居久其國福厚其居易福薄如此則鎮星乃為大福德與木無異豈非國家休祥所繫非民庶可得侔耶

失義不德白虎不出禁或逆枉矢射山崩日蝕天子失仁太白經天日食修庠山崩理惑

按禮記正義左傳昭三十一年十二月辛亥朔日有食之庚午之日始有謫謫謂日之將食之氣氣見於

上所以責人君也梓慎曰二至二分日有食之不為災也日月之行也分同道也至相過也其他月則為災陽不克也故常為水也然詩之十月則夏之八月秋分日食而為災者以辛卯之日卯往侵辛未反克金故為災昭七年夏四月甲辰朔日有食之而大咎衛君上卿四月夏之二月為災者以其甲辰之日甲為木辰為土木當克土今日食土反克木故為災也昭二十一年秋七月壬午朔而日食壬為水午為火

水應克火而日食火反克水不為災者以秋七月夏之五月是壬午之時得有克壬之理故不得為災

又按搜神記夏桀之時厲山亡秦始皇之時三山亡周顯王三十二年宋大丘社亡漢昭帝之末陳留昌邑社亡京房易傳曰山默然自移天下兵亂社稷亡也故會稽山陰瑯琊中有怪山世傳本瑯琊東武海中山也時天夜風雨晦冥旦而見武山在焉百姓怪之因名曰怪山時東武縣山亦一夕自亡去識其形

者乃知其移來今怪山下見有東武里蓋記山所自來以為名也又交州脆州山移至青州凡山徙皆不極之異也尚書金縢曰山徙者人君不用道士賢者不與或祿去公室賞罰不由君私門成羣不救當為易世變號又曰日月薄蝕彗孛流飛此天地之危診也寒暑不時此天地之蒸否也石立土踊此天地之瘤贅也山崩地陷此天地之癰疽也衝風暴雨此天地之奔氣也雨澤不降川瀆涸竭此天地之焦枯也

彗星出北斗兵大起在三台臣害君在太微君害臣在天獄諸侯作禍彗行所指其國大惡彗在日旁子欲殺父彗在月中者君有德天下欣心大豐盛

彗五彗也蒼則王侯破天子苦兵赤則賊起強國恣黃則女害色權奪於后妃白則將軍逆二季兵大作黑則水精賦河河決賊處處起

按前漢志歲星羸而東南石氏見彗星甘氏不出三月廼生彗本類星末類彗長二丈羸東北石氏見覺

星甘氏不出三月廼生天棓本類星末銳長四尺縮西南石氏見橈雲如牛甘氏不出三月廼生天槍左右銳長數丈縮西北石氏見槍雲如馬甘氏不出三月廼生天橈本類星末銳長數丈石氏槍橈棓彗異狀其殃一也必有破國危君伏死其辜餘殃不盡為旱凶饑暴疾至日行一尺出二十餘日廼入甘氏其國凶不可舉事用兵出而易所當之國是受其殃又曰祆星不出五年其下有軍及失地若國君喪

按晉志有祆星二十一而無雜妖隋志所集則庾季才靈臺秘苑也且志有雜妖又有星雜變文獻通考錄其雜變而遺雜妖併集於後

雜妖一曰天鋒彗象矛鋒者也主從橫天下從橫則天鋒星見二曰燭星狀如太白其出也不行見則不久而滅燭星所燭者城邑亂三曰蓬星狀如夜火之光在西南修數丈左右兑出而易處又曰蓬星狀如粉絮見則天下道術士當有出者布衣之士貴天下

太平五穀成四曰長庚狀如一匹布著天見則兵起
五曰四填出四隅去地六丈餘大而赤夜半時出見
十月而兵起亦曰地維藏光大而赤去地二三丈如
月始出東北隅天下大水出東南隅大旱西南隅西
北隅則兵大起

以上亦見晉志

七曰女帛變出東北水木氣

合也有大喪八曰盜星出東南火木氣合也多寇賊
九曰積陵出西北金水氣合也見則天下隕霜兵大
起人饑十曰端星大而赤察之中黃數動長可四丈

所出之氣効於四季名曰四隅所出兵大起十一曰
昏昌出西北氣青赤見則國易政先起者昌後起者
亡高十丈亂一年高二十丈亂三年高三十丈亂三
年十二曰華星出西北狀如有環一星見則諸侯有
失地十三曰白星有如星非星狀如削瓜為男喪十
四曰菟昌出西北有青赤環之此星見則天下改易
十五曰格澤狀如炎火上黃下白從地而上下大上
銳見則不種而穫又曰此熒惑之變見則伏尸流血

期三年十六曰歸邪狀如星非星如雲非雲見必有
歸國者十七曰濛星夜有赤氣如牙旗長短四面西
南最多又曰刀星亂之象

星雜變一曰星晝見若星與日並出名曰嫁女星與
日爭光武且弱文且強女子為王二曰恒星不見主
不嚴法度消又曰天子失政諸侯橫暴三曰星闕天
下大亂四曰星搖人衆將勞五曰星隕陽失其位災
害之萌又曰衆星墜人失其所也又曰奔星之所墜

其下有兵列宿之所墜滅家邦衆星之所墜衆庶亡
又曰填星墜海水佚黃星聘海水躍

古微書卷三十一

欽定四庫全書

古微書卷三十二

明 孫穀 編

河圖緯

賁居子曰緯候之興其生於河出圖一語乎自前漢世有河圖九篇洛書六篇云自黃帝至周文王所受本文又別三十篇云自初起至於孔子九聖增演以廣其意蓋七緯之祖本也顧漢志馬鄭皆

不道及惟梁崇文隋經籍有二十卷今讀其文淵
且豔也其錄則曰括地象曰絳象曰始開圖皆以
鈎山河之蹟曰帝覽嬉曰稽耀鈎皆以挾星象之
玄曰挺佐輔曰握矩記皆以闡運歷之要而又有
帝通紀真紀鈎著命秘徵要元考耀殘篇半牘錯
海希珍所遇之輒疏矣殆視諸緯為富云

河圖括地象

昔禹治水得括地象此其傳之最古也

易有太極是生兩儀兩儀未分其氣混沌清濁既分伏者為天偃者為地又曰元氣無形洶洶蒙蒙偃者為地伏者為天

天地精通神明列序

元氣闡陽為天積精為日

天不足西北地不足東南西北為天門東南為地戶天

門無上地戶無下

注天不足西北是天門地不足東南是地戶

天左動起於牽牛地右動起於畢

天有四表以布精魄地有四瀆以出圖書

天有五行地有五岳天有七星地有七表天有八氣地有八風天有九道地有九州天有四維地有四瀆天有九部八紀地有九州八柱

按淮南子東北為報德之維也西南為背陽之維東南為常羊之維西北為號通之維

天下九州內數中域以盡地化地中央曰崑崙崑崙東南地方萬五千里名曰神州中有五岳地圖帝王居

之八極之廣東西二億三萬三千里南北二億三萬
一千五百里夏禹所治四海內地東西二萬八千里南
北二萬六千里有君之州有九阻中土之文德及而不
治

崑崙之墟下通含右赤縣之州是為中則東南神州曰
晨土正南印州曰深土西南戎州曰滔土正西弇州曰
并土正中冀州曰白土西南桂州曰肥土北方玄州曰
成土東北成州曰隱土正東揚州曰信土

晨亦作農深一作沃白一

作中玄一作
濟信一作申

按淮南子九州之外乃有八殛亦方千里自東北方
曰大澤曰無通東方曰大渚曰少海東南方曰旻區
曰元澤南方曰大夢曰浩澤西南方曰渚資曰丹澤
西方曰九區曰泉澤西北方曰大夏曰海澤北方曰
大冥曰寒澤凡八殛八澤之雲是雨九州八殛之外
而有八紘亦方千里自東北方曰和丘曰荒土東方
曰棘林曰桑野東南方曰大窮曰衆女南方曰都廣

曰反戶西南方曰焦僥曰炎土西方曰金丘曰沃野
西北方曰一目曰沙所北方曰積氷曰委羽凡八絃
之氣是出寒暑以合八正必以風雨八絃之外乃有
八極自東北方曰方土之山曰蒼門東方曰東極之
山曰開明之門東南方曰波母之山曰陽門南方曰
南極之山曰暑門西南方曰編駒之山曰白門西方
曰西極之山曰闔闔之門西北方曰不周之山曰幽
都之門北方曰北極之山曰寒門凡八極之雲是雨

天下八門之風是節寒暑八紘八殞八澤之雲以雨九州而和中土

賁居曰昔聞神農之治地過日月之表此或神農之九州與蓋其說祖于鄒衍衍謂中國於天下乃八十一分之一耳中國外九州各有裨海環之如此者九乃有大瀛海環其外天地之際焉頗似佛說四天下及須彌山王三千大千之說而要其言以海為環則依然中夏之習見也近世有利瑪竇

自歐巴羅國越八萬里汎海而來其言海外大國
猥多而西視神州目為大明海居地才百之一則
瀛海之外豈遂無方輿哉鄒子之言倘猶存乎蠻
觸也顧漢儒括地志全述其文而隋代郊祀至以
九土列祀位亦可謂好大不經矣

凡天下有九區別有九州中國九州名赤縣神州即禹
之九州也上云九州八柱即大九州也非禹貢赤縣小
九州也

崑崙山為柱氣上通天崑崙者地之中也地下有八柱
柱廣十萬里有三千六百軸互相牽制名山大川孔穴
相通

按關令內傳地厚萬里其下得大空大空四角下有
自然金柱軌方員五千里

地南北三億三萬五千五百里地部之位起形高大者
有崑崙山從廣萬里高萬一千里神物之所生聖人仙
人之所集也出五色雲氣五色流水其泉南流入中國

名曰河也其山中應于天最居中八十城布繞之中國
東南隅居其一分是奸城也崑崙之山為地首上為握
契滿為四瀆橫為地軸止為天鎮立為八柱

崑崙之墟有五城十二樓河水出焉四維多玉

崑崙山有水水氣上蒸為霞

崑崙有柱焉其高入天即所謂天柱也圍三千里圓如
削下有仙人九府治與天地同休息其柱銘曰崑崙銅
柱其高入天圓周如削膚體美焉

按山海淮南怪談崑崙無異佛氏之侈須彌山也道家又以蓬萊為崑崙茲不具述惟赤霆一經相傳為張子房要其說地脉山原殊為奧窔其文曰崑崙柱天萬脈繇起西北綿亘幽寒莫詰為背為項為脊為毳下為鬣屬上為髮際面居泰雍耳目口鼻幽冀川蜀分左右背懸心闕腦腹垂洛汭胃脘出納為汧為渭大河大江經絡榮衛大腸膀胱震澤壘濟青徐以降是為髓髀泄為尾閭茫洋無際海洲萬國糞滓塵

穢

嶓冢山上為狼星武開山為地門上為天高星主圉圉
荆山為地雌上為軒轅星大別為地理天以合地以通
三危山在烏鼠之西南上為天苑星岐山在崑崙東南
為地乳上為天廩星汶山之地為井絡一日汶阜之山
江出其腹帝以會昌神以建福上為天井星桐柏山為
地穴上為維星烏鼠同穴山地之幹也上為掩畢星熊
耳山地門也精上為畢附耳星

太行山天下之脊

三危山黑水出其南

岐山上多白金周之興也鶯鶯鳴于岐山時人亦謂岐山為鳳凰堆

流州多積石其名曰昆吾鍊之成鏤以作劍光明如水晶石蓋鏤也

蟠冢山上有異花草名骨容食之無子

川德布精上為星河精上為天漢

井絡纏曜江漢晒靈泉流深遠盛為四瀆之昔

按張華敘神異經曰崑崙有銅柱焉其高入天所謂
天柱也圍三千里員周如削下有迴屋仙人九府治
上有大鳥名曰希有南向張左翼覆東王公右翼覆
西王母背上小處無羽一萬九千里西王母歲登翼
上之東王公也故其柱銘曰崑崙銅柱其高入天員
周如削膚體美焉其鳥銘曰有鳥希有緣赤煌煌不
鳴不食東覆東王公西覆西王母王母欲東登之自

通陰陽相須唯會益工

河圖始開圖

漢武按古圖書始名河所出曰崑崙張騫未之見也唐薛元鼎使吐蕃得源于穆穆哩山中亦非其真勝元命都實往求之朶甘斯西鄙有泉百泓行二十日至朶甘斯東北有大雪山始名崑崙則河源非崑崙明矣豈上古聖人亦有目力足踐所未及者乎失之古得之今失之千載得之一時學然

後知不足也

黃帝問風后曰余欲知河之始開風后曰河凡有五皆始乎崑崙之墟

黃河出崑崙東北角剛山東自北行千里折西行至蒲山南流千里至文山東流千里至秦澤西流千里至潘澤陵門東北流千里至華山之陰東流千里至於植雍南流千里至於下津然河水九曲其長九千里入於渤海

水經注黃河百里一小曲千里一曲一直

崑崙山北地轉下三千六百里有八玄幽都方二十萬里地下有四柱廣十萬里地有三千六百軸犬牙相舉按十三洲說崑崙山正在西海之戌地北海之亥地去岸十三萬里有弱水周迴繞匝山南接積石圃西北接北戶之室東北臨大活之井西南至承淵之谷此四角大山實崑崙之支輔也積石圃南頭昔西王母告周穆王去咸陽三十六萬里山高平去地三萬六千里上有三角面方廣萬里形如偃蓋上有金臺

玉闕亦元氣之所合天帝君所治處也 閱此說則
穆天子傳之崑崙即水經所謂高萬一千里者而山
海之崑崙止云廣八百里當別一小崑崙矣

黃泉之埃上為黃雲青泉之埃上為青雲赤泉之埃上
為赤雲白泉之埃上為白雲玄泉之埃上為玄雲

此即淮南子正土御埃天之說

九州殊題水泉剛柔各異青徐角羽集寬舒遲人聲緩
其泉鹹以酸荆揚角徵會氣漂輕人聲急其泉酸以苦

梁州商徵接剛勇漂人聲寯其泉苦以辛充豫宮徵含
平靜有慮人聲端其泉甘以苦雍冀合商明瑞駛烈人
聲捷其泉辛以鹹

按管子夫齊之水道躁而復故其民貪麤而好勇楚
之水淖弱而精故其民輕果而賊越之水濁重而洎
故其民愚疾而垢秦之水泔最而稽淤滯而雜故其
民貪戾罔而好事晉之水枯旱而運淤滯而雜故其
民諂諛葆詐巧佞而好利燕之水萃下而弱沈滯而

壅故其民愚戇而好貞輕疾而易死宋之水輕勁而清故其民間易而好正

淮南子汾水濛濁而宜麻濟水通和而宜麥河水中濁而宜菽雒水輕利而宜禾渭水多力而宜黍漢水重安而宜竹江水肥仁而宜稻平土之人慧而宜五穀夫水味之別則然矣論其極則庭州灞水金鉞皆漏廊延之川白脂日流弱水溺毛黑溪玄髓悉唐制角畔怯腐手水性不同有如此者其說曰庭州灞水

在大荒之外金鉄承之皆漏惟角與瓠葉則否拘夷
山中有流水亦如之廊延即延安石油也以為烟墨
松脂不及詳注石燭黑溪在南荒以其水塗石象至
輒不去昆侖以此塗身即能乘象如家畜古所謂黑
昆侖今之象奴也悉唐畔怯見佛書中

賁居曰水一耳泉何以品乎聲何以析乎則本草
之辨水其濫爾乎蒲元之論涪水雜以二斗亦知
其非蜀江張茂先之察江心問洛中篙師一皆首

服但不識桑苧翁從此會否張又新品水抑又亞之

河圖絳象

僧一行曰天下山川存乎兩戒北紀河源南紀江源然而河獨與雲漢相始終歷歷其所流所直莫非星也故河有圖江不聞圖焉有天下者保河則強塹江則弱

河導崑崙山名地首上為權勢星一曲也東流千里至

規其山名地契上為距樓星二曲也祁南

一作北流

千里至

積石山名地肩上為別符星三曲也邠南千里入隴首

山間抵龍門首名地根上為營室星四曲也龍門上為

王良星為天橋神馬出河躍南流千里抵龍首至卷重

山名地咽上為卷舌星五曲也東流貫砥柱觸闕流山

名地喉上為樞星以運七政六曲也西距卷重山千里

東至維會名地神上為紀星七曲也東流至大伾山名

地肱上為輔星八曲也東流至絳水千里至大陸名地

腹上為虛星九曲也

按河水發源有土蠻星宿海之說故緯書按天星以名其流要之上為星辰下為河漢凡江淮之瀆無不與星辰應也

黃河出崑崙東北流千里折西而行至於蒲山南流千里至於華山之陰東流千里至於桓雍北流千里至於下津河水九曲長九千里入於渤海

此文已見始開圖而語少畧因楊用修引為絳象故

錄于此

邠之隘上為扶桑日所升宣陸之阻上為吳泉月所登
按山海經紀日月之出者七日月所入五日月所出
入一其紀日月之出也曰大言山曰合虛山曰明星
山曰鞠陵山曰湯谷扶水曰猗天蘇門山曰壑明俊
疾山皆在大荒東經其紀日月之入曰豐沮玉門山
曰日月山天樞也曰鰲廬鉅山曰常陽山曰大荒山
皆在大荒西經曰浴日一在大荒南經之甘淵曰浴

月一在大荒西經之玄丹山其紀日月所出入一在大荒西經之方山柎格之松焉考之淮南子日所出入又多不同存而不論亦可也

太湖中洞庭山林屋洞天即禹藏真文之所一名包山吳王闔閭登包山之上命龍威丈人入包山得書一卷凡一百七十四字而還吳王不識使問仲尼詭云赤烏叩書以授王仲尼曰昔吾遊西海之上聞童謠曰吳王出遊觀震湖龍威丈人名隱居北上包山入靈墟乃造

洞庭竊禹書天帝大文不可舒此文長傳六百初令強
取出喪國廬丘按謠言乃龍威丈人洞中得之赤烏所
啣非丘所知也吳王懼乃復歸其書

按靈寶要畧昔太上以靈寶五篇真文以授帝嚳帝
嚳將仙封之於鍾山至夏禹巡狩度弱水登鍾山遂
得是文後復封之包山洞庭之室吳王闔閭出遊包
山見一人自言姓山名隱居闔閭扣之乃入洞庭取
素書一卷呈闔閭其文不可識令人齎之問孔子孔

子曰丘聞之童謠云吳王出遊觀震湖龍威丈人山
隱居北上包山入靈墟乃入洞庭竊禹書天地大文
不可舒此文長傳百六初若強取出喪國廬闔閭乃
尊事之

越絕書禹治洪水至牧德之山見神人焉謂禹曰勞
子之形役子之慮以治洪水無乃怠乎禹知其神人
再拜請誨神人曰我有靈寶五符以役蛟龍水豹子
能得之不日而就因授禹而誡之曰事畢可秘之於

靈山禹成功後乃藏之於洞庭包山之穴至吳王闔閭之時有龍威丈人得符獻之吳王以示羣臣皆莫能識乃令賫符以問孔子孔子曰昔禹治水於牧德之山遇神人授以靈寶五符後藏於洞庭之包山君王所得無乃是乎赤烏之事某所未詳使者反白闔閭乃尊事之先是江左童謡云禹治洪水得五符藏之洞庭之包山湖龍威丈人竊禹書得吾者喪國虛尋而吳果滅

孔子入吳信有之包山之謠亦必有自而第云靈
寶五符則或出附會者之口也

古微書卷三十二

欽定四庫全書

古微書卷三十三

明 孫穀 編

河圖稽耀鉤

稽耀曰鉤以言乎玄象之窈裔無不覩也

五星散為五色之彗 歲星之精流為國皇主內難

太白散為天狗主候兵辰星散為枉矢流枉矢所射可
誅 熒惑散為蚩尤旗主惑亂鎮星散為獄漢又為五

殘主兵亡又為旬始主招橫又為虹蜺主內淫又霓者氣也起在日側其色青赤白黃

歲星之精流為天棓天槍天猾天衝國皇及登蒼彗熒惑散為昭旦蚩尤之旗昭明司尤天欖赤彗填星散為五殘獄漢大賁昭星絀流旬始蚩尤虹蜺擊咎黃彗太白散為天杵天柎伏靈大敗司姦天狗天殘卒起白彗辰星散為枉矢破女拂樞滅寶繞紗驚理大奮祀黑彗五色之彗各有長短曲折應象

日月兩重暈者饑之祥也

蟾蜍去月天下大亂

月犯房天子有憂四足之蟲多死月犯心後星亂臣在旁

青雲刺月五穀不熟傍多赤雲如人頭大戰月旁有白雲如杵者三貫月六十日內有兵戰月始出有黑雲貫名激雲不出三日大雨

彗星出貫奎庫兵悉出禍在強侯外夷胡應逆首謀也

枉矢東流天下恐

按晉史志妖星二十有一曰彗星二曰孛星三日
天棓四曰天槍五曰天欖六曰蚩尤旗七曰天衝八
曰國皇九曰昭明十曰司危十一曰天譴十二曰五
殘十三曰六賊十四曰獄漢十五曰旬始十六曰天
鋒十七曰燭星十八曰蓬星十九曰長庚二十曰四
填星二十一曰地維藏光

賁居曰天棓天槍皆紫垣門內之宿似不得為妖

女孛本黃帝時一女子修行不得其死蚩尤則黃
帝所誅者而復能為妖於天亦可詫也

又

按晉志流星之類有音如炬火天保也所墜國有
喜若小流星青赤名地雁所墜有兵其光青赤長三
丈名天雁軍中之精華也其飛星大若缶若甕後皎
然白前卑後高此謂頓頑多死亡或大若缶甕星滅
後白者曲環如車輪此謂解御其國人相斬為爵祿
飛星如前但白者化為車輪下名曰大滑下有流血

又云東南有三星出名曰盜星出則天下有大盜西南有三大星出名曰種陵出則天下穀貴十倍西北三大星出而白名天狗出則人相食大凶東北有三大星出名曰女帛見則有大喪

黃黑氣掩日是為日薄凡日食皆於晦朔不有於晦朔者為日薄雖非日月同宿時陰氣盛掩日光也占類日食

月犯心有亂臣王者惡之又宮中有亂又有大喪犯中

星為人主犯前星為太子犯後星為庶子當之

河圖帝覽嬉

猶云覽德輝而嬉悅爾

黃道一青道二出黃道東赤道二出黃道南白道二出黃道西黑道二出黃道北日春東從青道夏南從赤道秋西從白道冬北從黑道立春星辰西遊日則東遊立夏星辰北遊日則南遊春分星辰西遊之極日東遊之極日與星辰相去三萬里夏至則星辰北遊之極日南

遊之極日與星辰相去三萬里立秋星辰東遊日則西
遊立冬星辰南遊日則北遊秋分星辰東遊之極日西
遊之極冬至星辰南遊之極日北遊之極相去各三萬
里

按漢志日有中道月有九行中道者黃道一曰光道
光道夏至北至於東井北近極故晷短冬至南至於
牽牛遠極故晷長春秋分日東至角西至婁去極中
而晷中日行不可指而知也故以二至二分之星為

候日東行星西轉冬至昏奎八度中夏至氐十三度
中春分柳一度中秋分牽牛三度七分中此其正行
也日行疾則星西轉疾事執然也

又按隋志日循黃道東行行東陸謂之春行南陸謂
之夏行西陸謂之秋行北陸謂之冬

又中興天文志占天之法以二十八宿為網維分列
四方南北去極各九十有一度冬則南遊春分星辰
西遊之極三十有六度一星辰相去三萬里夏至則

星辰北遊半在赤道內半在赤道外出入內遠極遠者皆二十有四度以其行赤道之中者名之曰黃道凡五緯皆隨日繇黃道行惟月之行有九道四時交會歸於黃道而轉變焉故有赤青白黑四者之異名然唐志又云黃道春分與赤道交於奎秋分交於軫西南至斗北至井與漢志殊蓋赤道分天之半今古不易黃道本無定體因日行而為之名日之行也每歲有差古今所以不同也

月未當望而望是謂從兵宜攻他人月當望而不望攻他人者有殃所宿之國亡地

月暈而珥六十日兵起不暈而珥全有喜兵在外而喜月不暈有四珥者臣有謀不成月暈三重天下受兵赤雲貫之其下亡地月暈四重其下亡國凶月暈七重其下亡國月暈九重其下兵起流亡五月中暈有九重以上者道上有熱死人地將動月犯太白其野受兵戰不勝又云所守之國兵起月暈太白與日共其分主憂星

出月陰負海國勝列星貫月陰國可伐

太星流八月中無光有兵死又曰使星八月主失其地
若星八月中無光將戮

彗星在月胡兵大起

彗出東方河逆決將相有謀

月食從上始謂之失國國君當之從旁始謂之失令相
當之從下始謂之失律將軍當之

從上下始謂之赤子失其陰為女其陽為男

月行南河兵旱並起男子喪

月犯太白強侯作亂以戰不勝

月暈辰星春夏民有寒熱疾秋兵起冬其下並憂

月犯南斗兵起國中

月犯心有亂臣王者惡之又曰宮中有亂

月暈胃民多腹疾貴臣死若熒惑在胃中則有兵歲令
在暈中有德令火入大微中留止為兵火起

河圖挺佐輔

此其符命之祖乎河洛易緯各載此事而文不一則雖無其文未必無其事也

伏羲禪於伯牛鑽木作火

黃帝修德立義天下大治乃召天老而問焉余夢見兩親挺白圖即帝以授余於河之都覺昧素善不知其理敢問於子天老曰河出龍圖雒出龜書紀帝錄列聖人之姓號興謀治太平然後鳳凰處之今鳳凰以下三百六十日矣古之圖紀天其授帝圖乎試齋以往視之黃

帝乃祓齋七日衣黃衣冠黃冕駕黃龍之乘戴蛟龍之旗天老五聖皆從以遊河洛之間求所夢見之者弗得至於翠嬀之淵大鱸魚汭流而至乃問天老曰子見夫中河流者乎曰見之顧問五聖皆曰莫見乃辭左右獨與天老跪而迎之魚汎白圖蘭葉朱文五色畢具天老以授黃帝舒視之名曰錄圖

錄圖曰渾渾嗚嗚棼棼雉雉萬物盡化

天授元始建帝號黃龍負圖鱗甲成字從河中出付黃

帝令侍臣目寫以示天下

黃帝遊於洛見鯉魚長三丈青身無鱗赤文成字

堯時與羣臣賢智到翠嫵之川大龜負圖來投堯堯勅臣下寫取告瑞應寫畢歸還水中

舜以太尉即位與三公臨觀黃龍五采負圖出置舜前以黃玉為桺白玉為檢黃金為繩黃芝為泥章曰天黃

帝符璽

又曰

黃龍從雒水出詣虞舜鱗甲成字舜令寫

之寫竟去

舜以土德故
一曰黃帝

一作文竟龍去

禹治水功大天帝以寶文大字賜禹佩渡北海免弱水之難

百世之後地高天下不風不雨不寒不暑民復食土皆知其母不知其父如此千歲之後而天可倚杵淘淘莫知始終

按正法經天圓十二綱地方十二紀天綱運闕三百六十輪為一周地紀推機三百三十輪為一度天運三千六百周為陽勃地轉三千三百度為陰蝕天氣

極於太陰地氣窮於太陽故陽激則勃陰否則蝕陰
陽勃蝕天地氣反天地氣反乃謂之小劫天運九千
九百周為陽蝕地轉九千三百度為陰勃陽蝕則氣
窮於太陰陰勃則氣極於太陽故陰否則蝕陽激則
勃陰陽蝕則天地政易天地政易謂之大劫

運度經云靈寶自然運度有大陽九六百六也小陽
九小百六也三千三百年為小陽九小百六也九千
九百年為大陽九六百六也夫天尻謂之陽九也地

虧謂之百六也至金天氏之後甲申之歲是其天地
運度否泰所終陽九百六會至時道德方明堯醜頓
肆聖君受任於壬辰之年也

皇民譜錄曰自三象明曜已來至以累億劫會天地
成敗非可勝載數極唐堯是為小劫丁亥之後甲申
之年陽九百六二氣離合壬辰之始數有九周至庚
子之年赤星見於東方白搏見于月窟唐堯之後四
十六丁亥是三劫之周又五十五丁亥至壬辰癸巳

是大劫之周也六合冥一二道盈虧時運周劫始轉
一仙階

賁居曰陽九百六之說僅見於道藏故備志之康
節先生妄以十二時分元會運世而以堯舜世為
己中至宋受命遂當申初恐天地之大終難以年
代限也

河圖握矩記

一作矩起

五運三正安有常期謂之握矩者明乎皇帝王之

迭興各有禎符若春規夏準秋矩冬權可象鑑而
不謬也

燧人之世大跡出雷澤華胥履之生伏羲一云伏羲在
亥得人定之時

伏羲禪於伯牛鑽木作火

黃帝名軒北斗黃神之精母地祇之女附寶之郊野大
電繞樞斗星耀感附寶生軒胸文曰黃帝子又附寶之
郊見電繞斗軒星照郊野感而生軒又黃帝母曰地祇

之子名附寶之郊野大霓繞北斗樞星耀感附寶生軒轅

令訾野中有玉虎晨鳴雷聲聖人感期而興又黃帝以雷精起玉虎晨鳴雷聲也

大星如虹下流華渚女節意感生白帝朱宣朱宣少昊氏瑶

光之星如蜺貫月正白感女樞於幽房之宮生黑帝顓

頊又曰帝乾荒擢首而謹耳玃喙而渠股是襲若水取

蜀山氏曰樞是為河女所謂淖子也淖子感搖光於幽

防而生顓頊

扶都見白氣貫星感生黑帝湯

姜原履大人之跡生后稷大姒夢大人死而生文王

賁居曰天之生奇杰瑰偉如其生怪石生妖禽偶
感異氣而出或於中夏或於蠻荒或為尤物或為
英人亦不計其為帝為王也如哀牢之觸沈木夜
郎之流竹孔廩君之涌土穴徐偃之生蝦孚或不
繇血氣不經人道咸自卓然何必為天下主而後

有奇徵哉且如桓靈寶之么麼而當其母誕時亦
感星墜銅盆吞之有娠使其後竟受偽命豈不與
瑤光薏苡同一瑞也然亦有漠然無瑞而為世雄
霸者矣意者天之間氣其亦偶然而集而不可以
概世類乎若曰天知有帝王而福之則佛說萬八
千天子恐不勝其休祥之煩

少昊秀外龍庭曰月縣通頤顙頊渠頭併幹通脊帶午
帝嚳駢齒方頤龐覲珠庭化齒戴千一本帝倍駢齒上

法日參秉度成紀以理陰陽

蒼帝方面赤帝圓面白帝廣面黑帝深面黃帝廣頭龍
額黃帝允頤黑帝修頸蒼帝並乳

蒼帝望之大視之博白帝望之明視之義

風后曰予告汝帝之五旗東方法青龍曰旗南方法赤
鳥曰旗西方法白虎曰典北方法玄蛇曰旂中央法黃
龍曰常

帝命伯禹曰告汝九術五勝之常可以克之汝能從之

汝師徒將興

黃帝曰凡人生一日天帝賜筭三萬六千又賜紀二千
聖人得三萬六千七百二十凡人得三萬六千一紀主
一歲聖人加七百二十

孝順二親得筭二千天司錄所表事賜筭中功

按太上感應篇天地有司過之神依人所犯輕重以
奪人筭筭減則貧耗筭盡則死又有三台北斗神君
在人頭上錄人罪惡奪其紀筭大則奪紀小則奪筭

人生而不自愛者其亦負上帝之賜多矣

黃金千歲生黃龍青金千歲生青龍赤金千歲生赤龍
白金千歲生白龍玄金千歲生玄龍

此即淮南子五龍五瀕之說已錄前運斗樞篇

黃帝生先致白狐

秦距之帝名政虎口日角大目隆鼻長八尺六寸身大
七圍手握兵執矢

怪目勇敢兩瞳天雨刀於楚之邦謂項羽

帝劉季日角戴勝斗胸龜背龍眼長七尺八寸明聖而
寬仁好生主軫劉受紀昌光出軫五星聚井

河圖秘徵

帝貪則政暴而吏酷酷則誅深深必殺主蝗蟲
主急妄怒失陽事則天無雲而雨

黃帝起大剗見

帝失德政不平則月生足又倍臣擅命羣下附和則月
舉足垂爪

河圖帝通紀

雲者天地之本也雨者天之施也風者天之使雷者天地之鼓彗星者天之旗

河圖著命

瑤光之星如蜺貫月正白感女樞於幽房之宮生黑帝
顓頊握登見大虹意感生舜於姚墟修己見流星
意感生帝戎文禹一名文命扶都見白氣貫日意感
生黑帝子湯太姪夢長人感已生文王

河圖真紀鈎

王者封泰山禪梁父易姓奉度繼典崇功者七十有二君

河圖要元篇

勾金之壇其間有陵兵病不起洪波不登又曰乃有地脉土良水清勾曲之山金壇之陵可以度世上昇曲城

要元篇蓋漢世緯書後漢書志註不載其目今見茅山志

河圖考靈耀

一作考耀文

秦王政以白璧沉河有黑頭公從河出謂政曰祖龍來
授天寶開中有尺二玉牘

高皇攝正總萬廷四海歸脉理威明文德道化承天精
元祚興隆協聖靈

河圖提劉篇

帝季日角戴勝斗胸龜背龍股長七尺八寸明聖寬仁
好士主軫

河圖稽命徵

帝劉即位百七十年太陰在庚辰江充詭其變天鳴地
坼


河圖會昌符

漢大興之道在九代之王封於太山刻石著紀禪於梁
父退省考功

河圖曰漢高祖親祀汶水見一黃釜却驚反化為一翁
責言劉季何不受河圖

河圖龍文曰鎮星光明八方歸德 赤九會昌十世以

光十一以興
九名之世帝行德封刻政



古微書卷三十三

欽定四庫全書

經部

古微書卷三十四至

詳校官監察御史臣施朝幹

刑部郎中臣許兆椿覆勘

總校官編修臣王燕緒

校對官中書臣田尹衡

謄錄監生臣金拱閏

欽定四庫全書

古微書卷三十四

明 孫穀 編

河圖玉板

緯之說兆于河圖故借河圖者益衆而濫河圖者益陋索之緯錄未聞有玉版者類書徵集頗有數條或亦其流沿之舊與

倉頡為帝南巡登陽虛之山臨于玄扈洛汭之水靈龜

負書丹甲青文以授之帝文枳二十八字景刻于陽虛之石室李斯止識八字曰上天垂命皇辟迭王今已不可尋矣

按金陵新志注云昔周初有於蒼頡墓下得石刻藏之書府至秦李斯辨其八字云上天作命皇辟迭王或云叔孫通識十一字而不傳妄也任昉云周人不能辨而斯通識之余不信也詳考二句乃寇謙所纂黑帝安和國王禁文也

湘夫人者帝堯女也秦始皇浮江至湘山逢大雨而問
博士湘君何神博士曰聞之堯二女舜妃也死而葬此
按禮記舜南巡狩蓋三妃未之從也郭璞注山海經
云明妃后生不從征死不從葬義可知矣列女傳二
女死于江湘之間又楚辭有湘君湘夫人遂比之處
妃洛神名實相亂矣及閱禮記所注三妃者謂宵明
燭光癸比不謂娥英也山海北經又云舜妻癸比氏
生宵明燭光處河大澤二女之靈能照此所方百里

則曲禮之三妃抑何其誣總之好古尊聖者務侈其說而遂以聖人之眷屬皆系神靈其實皆無可指耳

禹平天下會諸侯會稽之野防風氏後到殺之夏德之盛二龍降之禹使范成光御之行域外既周而還至南海經防風防風之神二臣以塗山之戮見禹使怒而射之迅雷風雨二龍昇去二臣恐以刃自貫其心而死禹哀之乃拔其刃療以不死之草是為穿胸民

古越俗祭防風神奏防風古樂截竹長三尺吹之如嗥

三人披髮而舞

左傳文公十一年鄭瞞侵齊叔孫得臣獲長狄僑如
注云鄭瞞漆姓北方長狄也在夏為防風氏殷為汪
芒氏

賁居曰秦漢之世幸而無是種也神哉大禹逆知
千年蓋亦慮後世當必有兵禍而震赫其武以為
之防與

從崑崙以北九萬里得龍伯國人長三十丈生萬八千

歲而死從崑崙以南得大秦人長十丈皆衣帛從此以東十萬里得佻人國長三十丈五尺從此以西十萬里得中秦國人長一丈大秦人民亦壽萬八千歲不知田作但食沙石子

按山海經大人國在蹉丘北為人大坐而削船又東海之外有波谷山有大人之國有大人之市名曰大人之堂有一大人踰其土張其兩耳郭璞注秦時大人見臨洮身長五丈腳跡六尺埤雅東南有人長七

丈名曰尺郭一曰黃父西地有人長二千里名無路
西南荒有人長尺名先通東南荒有人長千里名朴
父天竺車隣之國男女皆丈八尺大秦國人丈五尺
賁居曰列子所稱龍伯巨人七萬里不盈數步盖
亦有之而防風之身橫九畝眉見于軾驚陂之木
矢鉄鏃長六尺有半又特其眇小者爾又王莽時
奇士巨毋霸長一丈大十圍本出于蓬萊魏咸熙
大人見襄武長二丈脚跡三尺二寸符健皇始四

年有長人身長五丈是月霖雨河渭汎溢中流得
大屨一隻長七尺三寸屨指長尺餘而神異經則
云西北海外有人焉長二千里兩脚中間相去千
里腹圍一千六百里俱日飲天酒五斗張華注曰
天酒甘露也不食五穀魚肉唯飲酒好游山海間
不犯百姓不干萬物與天地同生名無路之人蓋
天地之大故應無所不有耳

少室山其上有白玉骨一服即仙矣

芝草樹生或如車馬或如龍蛇之狀

按抱朴子五芝有石芝本芝草芝肉芝菌芝各有名
品而肉芝則萬歲蟾蜍千歲蝙蝠靈龜風生獸千歲
驚菌芝狀如宮室或車馬或龍虎或飛鳥或人形五
色無常已上服之皆長生

龍魚河圖

河圖篇目已蕪矣類書所錄復有以龍魚命者豈
非以其玉石雜糅椒艾紛汨而衍其牘與要其文

字亦雅俚相乖政不必棄

月有九行赤道二出黃道北黑道二出黃道南白道二出黃道西青道二出黃道東併黃道為九行立春春分月從東青道立秋秋分從西白道立夏夏至從南赤道立冬冬至從北黑道天有四表月有三道聖人知之以延年益壽

按渾天說日道居中月五星循左右而行故日道獨謂之黃月行青朱白黑道各兼黃道而言故又謂之

九道也是故月道出入於黃道其最遠者去黃道六度月行黃道之內曰陰歷行黃道之外曰陽歷北為內南為外月行黃道之南謂之朱道行黃道之北謂之黑道黃道之東謂之青道黃道之西謂之白道黃道內外各四并黃道為九日月之行有遲有速難可以一術御也故因其合散分為數段每段以一色名之欲以別筭位而已

天歲星主德度其精下為天社之神天太白星主兵凶

其精下為雨師之神天熒惑星主司非其精下為風伯之神天辰星主氣司災其精下為先農之神天鎮星主得土之慶其精下為靈星之辰

按晉志凡五星盈縮失位其精降于地為人歲星降為貴臣熒惑降為童兒歌謠嬉戲填星降為老人婦女太白降為壯夫處於林麓辰星降為婦人吉凶之應隨其象告

天之東西南北極各有銅頭鉄額兵長三千萬丈三千

億萬人天之東西南北極各有金剛敢死力士長三千萬丈三千億萬人天中有太平之都有都中食鬼鉄面兵長三千萬丈三千億萬人 崑崙山天中柱也

按依順正理論云三十三天迷廬山頂其頂四面各二十千若據周迴數成八萬有餘師說面各八十千與下際四邊其量無別山頂四角各有一峯其高廣量各有五百有藥叉神名金剛手於中止住守護諸天於山頂中有宮名善見面二千半周萬踰繕那金

城量高一踰繕那半其地平坦亦真金所成俱用百億雜寶嚴飾地觸柔輭如妬羅錦於踐躡時隨足高下是天帝釋所都大城城有千門嚴飾壯麗門有五百青衣藥叉勇健端嚴長一踰繕那量各嚴鎧杖防守城門於其城中有殊勝殿種種妙寶具足莊嚴映蔽天宮故名殊勝面二百五十踰繕那周千踰繕那是謂城中諸可愛事城外四面四苑莊嚴是彼諸天共遊戲處一衆車苑謂此苑中隨天福力種種車現

三麤惡苑天欲戰時隨其所湏甲仗等現三雜林苑
諸天入中所玩皆同俱生勝喜四喜林院極妙欲塵
雜類俱臻歷觀無厭如是四苑形皆異方方周千踰
繕那量居各有一如意池池面各五十踰繕那量各
功德水彌滿其中隨欲四苑花鳥香林莊飾業果差
別難可思議天福城外西南角有大善法堂三十三
天時集辯論制伏阿素洛等如法事

責居曰諸天之淨也玄也而四隅八極猶各有咸

神以護其居陽之防陰如其亟也有天下者守
在四夷奈何其不豫

東方太山君神姓圖名常龍南方衡山君神姓丹名靈
峙西方華山君神姓浩名鬱狩北方恒山君神姓登名
僧中央嵩山君神姓軍壽名逸羣呼之令人不病

東方太山將軍姓唐名臣南方霍山將軍姓朱名丹西
嶽華陰將軍姓鄒名尚北嶽恒山將軍姓莫名惠中嶽
嵩高山將軍姓石名玄恒存之卻百邪

東海君姓馮名修青夫人姓朱名隱娥南海君姓視名
口赤夫人姓翳名逸寥西海君姓勾大名丘白夫人姓
靈名素簡北海君姓禹名帳里夫人姓結名連翹河伯
姓呂名公子夫人姓馮名夷君有四海河神名並可請
之呼之却鬼氣

按雲笈七籤東嶽姓丘名目陸南嶽姓爛名洋無
西嶽姓浩嶽名元倉北嶽姓伏名通萌中嶽姓角名
晉生句芒號曰文始洪崖先生東方蒼帝東海君也

祝融號曰赤精成子南方赤帝南海君也蓐收號曰
夏里黃公西方白帝西海君也禺疆號曰冥玄子昌
北方黑帝北海君也風伯神名吒號曰長育雨師神
名馮修號曰樹德馮夷號曰元梁使者

養生雜書曰東海姓何名歸君南海姓劉名漱君北
海姓吳名禽強君東海神名阿明南海祝融西海臣
乘北海禺強

廣雅山神謂之離河伯謂之馮夷江神謂之奇相物

神謂之鬼土神謂之獮羊水神謂之四鳥木神謂之畢方火神謂之游光金神謂之清明

賁居曰神豈有姓若字哉借有之孰相呼之且如天劉翁下降而張翁竄竊騎其龍以上則今之天翁已非昔天翁矣千億萬年仙神亦應乘除即欲執書策之名而呼之恐不應也好異者鈎探亦苦聊以博聞其實名類猥多不勝舉耳

鬻神名壽長耳神名嬌女目神名珠映鼻神名勇盧齒

神名丹朱夜卧呼之有患亦便呼之九過惡鬼自却

按黃庭經曰髮神蒼華字太元腦神精根字泥九眼
神明上字英玄鼻神玉壘字靈堅耳神空間字幽田
舌神通金字正倫齒神齔鋒字羅千一面之神宗泥
九又心神丹元字寸靈牙神皓華字虛成肝神龍烟
字含明腎神玄冥字育嬰脾神嘗在字魂停膽神龍
曜字威明皆在心內運天經晝夜存之自長生

酉陽雜俎身神及諸神名異者腦神曰覺元髮神曰

玄華目神曰虛監鼻神曰冲龍玉舌神曰始梁

讀百骸神名可以思養生主矣

神名飛揚矛神名天矢陰弓之神名曰曲張斧神名
狂章盾神名自障

按埤雅粟曰許給豆曰靈殖黍曰俯佞曲張弓也推
亡遠望弩也續長箭也脱光刀也飛揚劔也狂章斧
也馮耳孟公船神也黃父漸耳食鬼之神也其貴神
之異名又曰五岳神泰曰圓常龍衡曰丹靈峙華曰

浩鬱狩恒曰登僧嵩曰軍壽逸羣四海神東曰馮修
青南曰視赤西曰勾火丘百北曰禹帳里江神曰奇
相河伯曰冰夷淮神曰巫支祁波神曰陽侯游光畢
方火神也清明金神也沐腫水神也彭侯雲陽木精
也獐羊賈詡土精也

黃帝攝政時有黃尤兄弟八十一人並獸身人語銅頭
鐵額食沙石子造立兵杖刀戟大弩威振天下誅殺無
道不仁慈萬民欲令黃帝行天子事黃帝仁義不能禁

止蚩尤遂不敵黃帝仰天而嘆天遣玄女下授黃帝兵
信神符制伏蚩尤帝因使之主兵以制八方蚩尤沒後
天下復擾亂不寧黃帝遂畫蚩尤形象以威天下天下
咸謂蚩尤不死八方萬邦皆為弭伏

賁居曰昔漢祖持項王頭以下魯城亦師此意然
則軒轅得蚩尤而立其威彼蚩尤者亦得軒轅而
顧成其神耳

流洲在西海中地方三千里上多山川積石名為昆吾

石冶其石為鐵作劍光明四照洞如水精以割玉如泥
玄洲在北海中地方三千里去南岸十萬里上有芝草
生玄澗澗水如蜜味服之長生

歲暮夕四更取二十豆子二十七麻子家人頭髮少許
合麻豆著井中咒勅并使其家竟年不遭傷寒辟五方
痰鬼

懸艾虎鼻門上宜官子孫帶印綬懸虎鼻門中周一
年取燒作屑與婦飲之二月中便有兒生貴子勿令人知

之泄則不驗也亦勿令婦見之

七月七日取小赤豆男吞一七女吞二七令人畢歲無

病又七月七日曬曝革裘無蟲又七月七日取烏鷄血

和三月三日桃花末塗面及遍身三二日肌白如玉

冬以臘月鼠斷尾正月旦日未出時家長斬鼠著屋中

祝云付勅屋吏制斷鼠蟲三時言功鼠不敢行

埋蚕沙於宅亥地大富得蚕絲吉利以一斛二斗甲子

日鎮宅大吉致財千萬

婦人無以夫衣合集浣之使不利 無以賣馬錢娶婦
以賣馬錢娶婦令多惡病夫妻離別

白馬玄頭食之殺人下病食馬肉亦殺人 羊有一角
食之殺人 玄鷄白頭食之病人鷄有四距殺人六指
亦殺人鷄有五色殺人 犬狗魚鳥不熟食之成瘕
瓜有兩鼻者殺人

按太清外衛生人髮掛菓樹鳥鳥不敢食其實 芘
兩鼻兩蒂食之殺人 簷下滴菜有毒堇黃花及赤

芥殺人 瓠牛踐苗則子苦 大醉不可卧黍穰上

汗出睂髮落 婦人有脈食乾薑令胎內消十月食

霜菜令人面無光 三月不可食陳蒟 沙衣結治

蠅蝮瘡 井口邊草主小兒夜啼著母卧薦下勿令

知之

闕

氏苔療天行 寡婦葉薦草節去小兒霍

亂 自縊死繩主顛狂 孝子衿灰傳面酤 東家

門雞棲木作灰治失音 砧垢能蝕人履底 古櫬

板作琴底合陰陽通神 魚有睫及目合腹中目連

珠二目不同連鱗白鬚腹下丹字並殺人 鼈目白

腹下五字十字不可食 蟹腹下有毛殺人 蛇以

桑柴燒之則見足出 獸歧尾鹿斑如豹羊心有竅

悉害人 馬夜眼五月以後食之殺人 犬懸蹄肉

有毒 白馬鞍下肉傷人五臟 烏自死目不閉鴨

目白烏四距卵有八字並殺人 凡飛鳥投人家井

中必有物當拔而放之 水脉不可斷井中沸不可

飲酒漿無影者不可飲 蝮與青蛙蛇中寢毒蛇怒

時毒在頭尾 凡冢井間氣秋夏中之殺人先以鷄
毛投之毛直下無毒迴旋而下不可犯當以醋數斗
澆之方可入矣 頗梨千歲冰所化也 琉璃瑪瑙
先以自然灰煮之令軟可以雕刻自然灰生南海馬
腦鬼血所化也

高皇攝政總萬庭四海歸脉治威明文德道化承天精
元祚興隆協聖靈

古微書卷三十四